

BROJ 20

Magazin Muslimah

رضی اللہ عنہا

Vrijednost i odlike mubarek mjeseca

ليلة القدر
Blagoslovljena noć

Pozivanje postača na iftar

Sadržaj

Vrijednost i odlike mubarek mjeseca	3
Mjesec ramazan je istaknut ispred drugih mjeseci	5
Suze pokajnika	7
O zekatu	8
Pozivanje postača na iftar	10
Zekatul fitr	11
Selef i ramazan	12
O sehuru	13
Spoj između Allahovih prava i prava ljudi	14
Giber veliki grijeh	15
Pitanja o ramazanu	16
Dragocjeno mjesto	17
Najodabranija noć	18
Za razmišljanje	21
Kada se podudare dva praznika	22
Tebi sestro, savjet ovaj	24
Odgovori na pitanja o ramazanu	27



Mjesec ramazan je mjesec kada je počelo objavljivanje Kur'ana, koji je putokaz ljudima i jasan dokaz pravog puta i razlikovanje dobra od zla. Uzvišeni Allah je odlikovao mjesec ramazan sa mnogobrojnim vrijednostima. Neke od njih ćemo ovdje nabrojati.

Mjesec Kur'ana

“U mjesecu ramazanu počelo je objavljivanje Kur'ana, koji je putokaz ljudima i jasan dokaz pravog puta i razlikovanje dobra od zla.

Ko od vas u tom mjesecu bude kod kuće, neka ga u postu provede!”

(prevod sure El-Bekare, 185)

Oprost grijeha

Od Ebu Hurejre, radijallahu anhu, se prenosi da je Posalnik, sallallahu alejhi ve sellem, rekao *“Ko isposti ramazan vjerujući i nadajući se nagradi, oprošteni su mu grijesi koje je do tada počinio.”* (Buharija, 4/99 i Muslim, 759)

Od Ebu Hurejre, radijallahu anhu, se takođe prenosi da je Poslanik, sallallahu alejhi ve sellem, rekao: *“Pet dnevnih namaza, džuma do džume, ramazan do ramazana - brišu grijehe između njih, ako se klonite velikih grijeha.”* (Muslim, 233)

Post je štit

Rekao je Poslanik, sallallahu alejhi ve sellem: *“Nema nijednog roba koji isposti jedan dan na Allahovom putu a da Allah ne udalji time njegovo lice od džehennemske vatre, koliko je udaljenost koja se pređe za sedamdeset godina.”* (Buharija, 6/35 i Muslim 1153)“

Velika nagrada za post

Rekao je Poslanik, sallallahu alejhi ve sellem: *“Svako čovjekovo dobro djelo se uvećava. Jedno dobro djelo se uvećava deset puta, do sedam stotina puta. Kaže Allah, Subhanehu ve Te’ala: ‘osim posta, jer on je Moj i Ja nagrađujem za njega. Moj rob ostavlja svoju strast i hranu zbog mene. Postač ima dvije radosti: radost pri iftaru i radost prilikom susreta njegovog Gospodara. Miris iz usta postača je kod Allaha ljepši od mirisa miska.”* (Muslim)

Primanje dove i oslobađanje od vatre

Prenosi se da je Poslanik, sallallahu alejhi ve sellem, rekao: *“Zaista Allah u mjesecu ramazanu, svaki dan i noć ima one koje oslobađa vatre, a svaki musliman koji uputi dovu tražeći njome nešto, biva mu uslišana.”* (El-Bezzar, 3142, Ahmed, 2/254, Ibn Madždže, 1643)

Okivanje šejtana, zatvaranje vrata Džehennema a otvaranje vrata Dženneta

Poslanik, sallallahu alejhi ve sellem, je rekao: *“Kada dođe ramazan, otvore se vrata Dženneta, a zatvore se vrata Džehennema, i okuju se šejtani.”* (Buharija, 4/97 i Muslim, 1079)


Lejletul kadr

Kaže Uzvišeni Allah:

**“Mi smo ga počeli objavljivati u Noći Kadr - a šta ti misliš šta je noć Kadr?
Noć Kadr je bolja od hiljadu mjeseci - meleki i Džibril, s dozvolom Gospodara svoga, spuštaju se u njoj zbog odluke svake, sigurnost je u njoj sve dok zora ne svane.”**
(prevod sure El-Kadr, 1-5)

“Mi smo počeli da je u Blagoslovljenoj noći objavljujemo - Mi, doista, opominjemo - u kojoj se svaki mudri posao riješi po zapovijedi Našoj! Mi smo, zaista, slali poslanike kao milost Gospodara tvoga - On, uistinu, sve čuje i sve zna.”
(prevod sure Ed-Duhan, 3-6)

Pripremila Ummu Zejneb





Uzvišeni Allah kaže:

“U mjesecu ramazanu počelo je objavljivanje Kur'ana, koji je putokaz ljudima, jasan dokaz Pravog puta i razlikovanja dobra od zla.”
(prevod sure El-Bekara, 185)

Allah Uzvišeni ističe mjesec posta ispred drugih mjeseci time što ga je odabrao za objavu Kur'ana časnog. U hadisu se navodi da je to mjesec u kojem su Božije knjige objavljivane vjerovjesnicima, a imam Ahmed ibn Hanbel, rahimehullah, prenosi od Vaila ibn Eska'a da je Allahov Poslanik, sallallahu alejhi ve sellem, rekao: *“Suhufi (spisi Ibrahimovi) objavljeni su prve noći mjeseca ramazana, Tevrat je objavljen šeste noći mjeseca ramazana, Indžil trinaeste noći mjeseca ramazana, a Allah je objavio Kur'an dvadeset četvrte noći mjeseca ramazana.”*

Međutim, i suhufi, i Tevrat, i Zebur, i Indžil objavljeni su vjerovjesnicima odjednom, dok je Kur'an odjednom objavljen do Kuće uzvišenosti na Dunjalučkom nebu, što se desilo u Noći sudbine (Lejletul-kadr) mjeseca ramazana, kao što Uzvišeni kaže:

“Mi smo ga objavili u Noći blagoslovljenoj.”
(prevod sure Ed-Duhan, 3)

te kaže Uzvišeni:


“Mi smo ga objavili u Noći sudbine.”
(prevod sure El-Kadr, 1)

Nakon toga, Kur'an je objavljen Allahovom Poslaniku, sallallahu alejhi ve sellem, u posebnim dijelovima, prema slijedu događaja. U jednom predanju Ikrima od Ibn-Abbasa navodi se:

“Kur'an je objavljen na ovosvjetsko nebo odjednom, u Noći sudbine mjeseca ramazana. Allah je govorio Svom Vjerovjesniku što je htio tako da mušrici (mnogobošci) nisu mogli navesti nijedan primjer na koji im Allah nije odgovorio. U tom smislu Allah Uzvišeni kaže:

“Oni koji ne vjeruju govore: ‘Trebalo je da mu Kur'an bude objavljen čitav i to odjednom!’
A tako je, da bismo srce tvoje učvrstili, pa ga Mi ajet po ajet objavljujemo.
Oni ti neće nijedan primjer navesti, a da ti Mi nećemo istinu dati i
najljepše objašnjenje navesti.’”
(el-Furqan, 32-33)

Tefsir Ibn Kesir



Ebu Hurejre, radijallahu anhu, prenosi da je Allahov Poslanik, sallallahu alejhi ve sellem, rekao:

“Ko Noć kadrā provede u kijamu (klanjajući namaz), vjerujući u njen blagoslov, tražeći na taj način nagradu od Uzvišenog, bit će mu oprošteni prijašnji grijesi.”

(Buharija i Muslim)

Od, Aiše, radijallahu anha, se prenosi da je Allahov Poslanik, sallallahu alejhi ve sellem, preporučio:

“Tražite

Lejletu-l-kadr u neparnim noćima posljednjih deset dana ramazana!”

Buharija

"Tražim Tvoju veličajnost: nemoćan sam
- pa mi Svoju milost ukaži!

Molim za Tvoju snagu: ovisan sam
- pa me Svojom moći osnaži!

Evo me natovaren grijesima pred
Tobom!

Osim mene, Ti robova imaš mnogo,
a ja, pored Tebe, drugog Gospodara
nemam!

Ja nemam ni skloništa ni spasenja
- osim kod Tebe! Tražim od Tebe glasom
miskina,

preklinjem Te molbom nevoljnika,
zovem Te strahom ispunjen, savivši svoj
vrat, oborivši glavu,
kroz suze, poniznog srca:
'O Ti, kod koga je stjecište mojih
nadanja
- kod Koga je utočište za moja
strahovanja!

Ljudi ne mogu osnažiti kost koju Ti
polomiš, niti mogu polomiti
onu kojoj Ti stamenost pokloniš!"

Suze pokajnika



primjeri istinskog vjerovanja



Uzvišeni Allah kaže:

“O vjernici, udjeljujte od lijepi stvari koje stičete i od onoga što vam Mi iz zemlje dajemo, ne izdvajajte ono što ne vrijedi da biste to udijelili - kad ni vi sami to ne biste primili osim zatvorenih očiju, I znajte da Allah nije ni o kome ovisan i da je hvale dostojan.”
(prevod sure El-Bekare, 267)

U tefsiru Ibn Kesira navodi se o ovom ajetu: “Allah Uzvišeni naređuje Svojim robovima, vjernicima, da dijele od svoga imetka, pod čim se ovdje misli na sadaku (dobrovoljnu i obaveznu).

Ibn Abbas kaže: “Od lijepih stvari imovine kojom ih je Allah opskrbio, te su je stekli.”

Isto tako on kaže: “Naredio im je da dijele od najljepšeg, najkvalitetnijeg i najvrednijeg dijela imetka, a zabranio da daju sadaku (zekat) od lošeg, nekvalitetnog i pokvarenog dijele imetka, jer i Allah je dobar i prima samo dobro.”

**“I od onoga čime vas Mi opskrbljujemo udjeljujte prije nego nekome od vas smrt dođe, pa da onda rekne: ‘Gospodaru moj, da me još samo kratko vrijeme zadržiš, pa da milostinju udjeljujem i da dobar budem!’ Allah sigurno neće ostaviti u životu nikoga kome smrtni čas njegov dođe;
a Allah dobro zna ono što vi radite.”**
(prevod sure Munafikun, 10 -11)

“Onima koji zlato i srebro gomilaju i ne troše ga na Allahovu putu - navijesti bolnu patnju. Na Dan kad se ono bude u vatri džehennemskoj usijalo, pa se njime čela njihova i slabine njihove i leđa njihova budu žigosala. ‘Ovo je ono što ste za sebe zgrtali; iskusite zato kaznu za ono što ste gomilali!’”
(prevod sure Et-Tevba, 34-35)

Od Ebu Hurejre, radijallahu anhu, se prenosi da je Allahov Poslanik, sallallahu alejhi ve sellem, rekao: “Ko da sadaku koja iznosi vrijednost jedne datule, stečene na halal način, a Allah, Subhanehu ve Te’ala, i ne prima ništa drugo osim onoga što je stečeno na dozvoljen, halal, način, Allah će je uzeti u Svoju ruku, a zatim će je gajiti za njenog vlasnika, kao što neko od vas gaji i brine se o malom ždrijebetu, sve dok ne postane kao brdo.” (Buharijin Sahih, odjeljak o zekatu)

Rekao je Allahov Poslanik, sallallahu alejhi ve sellem: “Tako mi Onoga u Čijoj je ruci moja duša (ili: - tako mi Onoga pored Koga nema drugog boga), nema ni jednog čovjeka koji posjeduje deve, krave ili bravčad i ne daje na njih zekat, a da one neće doći na Sudnjem danu veće i deblje nego sto su bile, pa će ga gaziti svojim papcima i bosti svojim rogovima, kada god prođe jedna, za njom dođe druga, i tako sve dok se ne završi sa presudom svijetu.” (Buharijin Sahih, odjeljak o zekatu)

الدُّعَاءُ عِنْدَ الْإِفْطَارِ

كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ

إِذَا أَفْطَرَ قَالَ :

ذَهَبَ الظَّمَأُ وَابْتَلَّتِ الْعُرُوقُ

وَتَبَّتِ الْأَجْرُ إِنْ شَاءَ اللَّهُ

رواه أبو دؤاد







Pozivanje postača na iftar

Veliko je dobro da se potruđiš da pozoveš postača na iftar, jer u tome je velika nagrada i opšta korist. Poslanik, sallallahu alejhi ve sellem, je rekao: *“Ko pozove postača na iftar ima nagradu kao on, a da to ne umanji ništa od nagrade postača.”* (Ahmed, 4/114,115 i116, Tirmizi 804, Ibn Madždže 1764 i Ibn Hibban 895)

Pohvalno djelo za onoga koji je pozvan jeste da nakon završetka s jelom uputi dovu za onoga koji ga je pozvao, u skladu s onim što se prenosi od Poslanika, sallallahu alejhi ve sellem, tih dova ima više poput:

- *Allahume atin men ata ameli veski men sekani* (Gospodaru moj, nahrani onog ko me je nahranio i napoji onoga kome je napojio) (Muslim, 2055)

- *Allahume-egfir lehmu verhamhum ve barik fima rezaktehum* (Gospodaru moj, oprosti im i smiluj im se i daj im bereket u onome čime si ih opskrbio.) (Muslim 2042)

Dova koja se ne odbija prilikom iftara, shodno hadisu Ebu Hurejre, radijallahu anhu, od Poslanika, sallallahu alejhi ve sellem: *“Trojici se ne odbija dova: postaču prilikom iftara, pravednom vladaru i onome kome je učinjena nepravda.”* (Tirmizi 2528, Ibn Madždže 1752 i Ibn Hibban 2407)

Najbolja dova je ona koja se prenosi od Poslanika, sallallahu alejhi ve sellem, koju bi izgovarao prilikom iftara: *“Zehebez-zamu vebtelletil-uruku ve sebetel-edžru inšaAllah.”* (Nestala je žeđ i ovlažile su vene i potvrđena je nagrada, ako Allah da) (Ebu Davud, 2/306, Bejheki 4/239, Hakim, 1/422, En Nesai 269, Darekutni 2/185)



ZEKATUL FITR



On se ne daje osim onome kome je propisano, a to su siromasi, po hadisu Ibn Abbasa, radijallahu anhu: “Poslanik, sallallahu alejhi ve sellem, je propisao zekatul-fitr kao čišćenje za postača, od ružnog i beskorisnog govora i kao hranu za siromahe.” Ovo je mišljenje odabrao šejhul-islam Ibn Tejmijje u svome djelu “*Medžmu’ul fetava*,” (pogledaj: 25/71-78), i njegov učenik Ibn Kajjim u svojoj vrijednoj knjizi “*Zadul me’ad*,” (2/44).

Ibn Omer, radijallahu anhu, je davao zekatul fitr onima koji ga skupljaju, a to su bili radnici koje je imenovao vođa muslimana, i to prije Bajrama, na dan ili dva. Ibn Huzejme, prenosi putem Abdul Varisa od Ejuba: “Upitao sam: ‘Kada je Ibn Omer davao sa’ (zekatul fitr)?’ Rekao je: ‘Kada se odredi sakupljač.’ ‘Kada bi bio određivan sakupljač?’ Upitao sam ponovo. Rekao je: ‘Prije Bajrama, na dan ili dva.’”

Preneseno je: “Poslanik, sallallahu alejhi ve sellem, je propisao zekatul-fitr od jednog sa’a (četiri pregršti) hurmi ili sa’a pšenice, na svakoga roba ili slobodnog čovjeka, muškarca ili ženu, malog ili velikog među muslimanima.” (Buhari, 3/291 i Muslim, 984)

Ibn Abbas, radijallahu anhu, prenosi sljedeći hadis: “Poslanik, sallallahu alejhi ve sellem, nam je naredio da dajemo zekatul-fitr u ramazanu: sa’ hrane na malo i veliko, slobodnog i roba, pa ko bi dao ječam bilo bi primljeno od njega. Mislim da je rekao: ‘Ko bi dao brašno bilo bi primljeno, i ko bi dao prekrupu bilo bi primljeno.’” (Ibn Huzejme, 4/80, sa ispravnim senedom)

“Dajite sa’ pšenice za dvoje, ili dajite sa’ datula, ili sa’ječma, za svaku slobodnu osobu, roba, malog ili velikog.” (Ahmed, 5/432, od Sa’lebe ibn Su’ajra)

Sa’ koji se uzima u obzir je sa’ stanovnika Medine, po hadisu Ibn Omera, radijallahu anhu, koji je rekao: “Poslanik, sallallahu alejhi ve sellem, je rekao: ‘Težina je shodna vaganju stanovnika Mekke, a količina je shodna mjerenju stanovnika Medine.’” (Ebu Davud, 2340, En-Nesai, 7/281 i El Bejheki, 6/31)

Selef i ramazan

Prenosi se da je Hammad ibn Ebi Sulejman bio bogat čovjek koji je priređivao iftar za 500 ljudi za vrijeme ramazana i svakom od njih bi dao 100 dirhema za bajram. Takodjer se prenosi da je priređivao iftar za 50 siromaha svaki dan za vrijeme ramazana, a u noći pred bajram bi im svima poklonio novu odjecu.

Sijar e'lam en-nubela od imama Ez-Zehebija

Prenosi se da je Selejman ibn Musa, rahimehullah, rekao: Kada postiš, tvoj sluh i vid trebaju također postiti, i tvoj jezik treba postiti ustezanjem od laži; i nemoj povrijediti svoga slugu. Ne dozvoli da ti dan u kojem postiš, bude kao dan u kojem ne postiš.

Tarik Dimišq

Prenosi se da je Ibn Omer, radijAllahu anhu, rekao: Post ne znači puko ustezanje od hrane i pića, nego takodjer znači ustezanje od laganja, činjenja loših djela, bezposlica i zaklinjanja Allahom (bez potrebe).

El-Musenef od Ibn Ebi Sejbeh.

Allah i njegovi melec **donose salavate na one koji sehure**

Najveći bereket sehura je to što Allah, Subhanehu ve Te'ala, obuhvata Svojim oprostom one koji sehure, prosipa na njih Svoju milost, a Njegovi melec traže oprosta za njih i mole Allaha da pređe preko njihovih grijeha. Sve to kako bi bili od onih koje Milostivi oslobađa vatre u mjesecu Kur'ana – ramazanu.

Od Ebu Se'ida El-Hudrija, radjallahu anhu, se prenosi da je rekao: "Poslanik, sallallahu alejhi ve sellem, je rekao: 'Sehur je obrok bereketa pa ga ne ostavljajte, makar neko od vas popio samo gutljaj vode, jer Allah i Njegovi melec donose salavate na one koji sehure!'" (Hadis je vjerodostojan)

Zbog toga ne smijemo propustiti ovu veliku nagradu od Milostivog Gospodara. Najbolji sehur vjernika su temre (hurme). Poslanik, sallallahu alejhi ve sellem, je rekao: "Najbolji sehur vjernika su temre." (Ebu Davud, 2/303, Ibn Hibban, 223, El-Bejheki 4/237)

Odlaganje sehura

Odlaganje sehura je preporučeno do malo prije same zore, jer su Poslanik, sallallahu alejhi ve sellem, i Zejd ibn Sabit, radijallahu anhu, jednom prilikom sehurili, pa kada su završili Poslanik, sallallahu alejhi ve sellem, je ustao i klanjao namaz. Između završetka njihovog sehura i namaza bilo vremena koliko treba čovjeku da prouči pedeset ajeta iz Kur'ana.

Enes, radijallahu anhu, prenosi od Zejda ibn Sabita, radijallahu anhu, da je rekao: "Sehurili smo sa Poslanikom, sallallahu alejhi ve sellem, a zatim je on ustao na namaz. Upitao sam: 'Koliko je prošlo vremena između ezana i sehura?' Rekao je: 'Koliko je potrebno za pedeset ajeta.'" (Buharija, 4/118 i Muslim, br. 1097)

Poslanik, sallallahu alejhi ve sellem, je rekao: "Ko želi da posti neka nečim sehuri." (Ahmed, 3/367 i drugi) Takođe je rekao: "Sehurite, jer u sehuru je bereket!" (Buharija, 4/120 i Muslim, br. 1095) Zatim je objasnio vrijednost sehura u odnosu na njegov ummet, pa je rekao: "Ono što razdvaja naš post od posta ehli-kitabija jeste jelo na sehuru."



Rekao je Poslanik, sallallahu alejhi ve sellem: *“Hoćete li da vas obavijestim ko je od vas Allahu najdraži i ko će meni biti najbliži na Sudnjem danu? - ‘Hoćemo’, rekoše ashabi, a Poslanik im reče: ‘Oni koji budu najljepšeg ponašanja.’* (Ibn Hibban, 478, vidi: Džami el-ulum vel-hikem od Ibn Redžeba, 1/454-456, Medaridžus-salikin 2/304-307)

Ibn Kajjim, Allah mu se smilovao, kazao je: *“Cjelokupna vjera jeste lijepo ponašanje, pa ko te podučiti lijepom ponašanju podučio te je vjeri.”* (Medaridžus-salikin 2/307)

Ibn Redžeb, Allah mu se smilovao, u komentaru Poslanikovih, sallallahu alejhi ve sellem, riječi: *“I prema ljudima se ophodi najprimjernije”* (Ovo je dio hadisa a zabilježili su ga: Ahmed i Tirmizi) rekao je: *“Ovo je jedan od sastavnih dijelova bogobožnosti i bez njega je bogobožnost nepotpuna. Mnogi ljudi misle da se bogobožnost sastoji samo od ispunjavanja obaveza prema Allahu a ne i prema ostalim ljudima, pa je upravo zbog toga Poslanik, sallallahu alejhi ve sellem, lijepo ponašanje spomenuo u ovom kontekstu i naredio da se prema ljudima*

ophodi najprimjernije. Veoma puno je onih koji dosljedno izvršavaju svoje obaveze prema Allahu, ali, s druge strane, oni su zapostavili prava drugih ljudi, djelimično ili potpuno. Stoga spoj između Allahovih prava i prava ljudi, te upotpunjavanje obje strane, nije nimalo lagahan posao a u tome uspijevaju samo oni koji su najpotpunijeg imana, vjerovjesnici i iskreni” (Džami el-ulum vel-hikem, 1/454)

“Poslanikov edeb”





Ogovaranje je velik grijeh njegovo činjenje zahtjeva iskreno pokajanje Allahu Uzvišenom. Ogovaranje je grijeh jer je osoba koju ogovaraju odsutna sa tog skupa i ne može se braniti. Ta osoba nema priliku da objasni i opravda svoje stanje. A to je u suprotnosti sa Allahovim, Subhanehu ve Te'ala, naređenjem:

“a ljudima lijepo riječi govoriti...”
(prevod sure El-Bekare, 83)

Islam naglašava važnost istinitog govora i provjera činjenica prije donošenja bilo kakvih odluka o nekom pitanju. U sljedećem ajetu se od vjernika traži da prvo provjere činjenice prije nego što formiraju svoje mišljenje o nekoj stvari. Nema žurbe u donošenju zaključaka sve dok se ne ispune potrebni uvjeti za to. Ako dublje razmislimo o ovom ajetu, vidjećemo da nam također ukazuje na važan kriterij za donošenje zaključaka koji se tiču historije.

“O vjernici, ako vam nekakav nepošten čovjek donese kakvu vijest, dobro je provjerite, da u neznanju nekome zlo nečinite, pa da se zbog onoga što ste učinili pokajete.”
(prevod sure Hudžurat, 6)

Sumnje također otvaraju vrata šejtanu. Mudrost svih propisa naše vjere je da oni blokiraju ta vrata, kako šejtan ne bi došao do nas. Sumnja može dovesti do djela i koraka koje treba poduzimati samo uz čvrste dokaze. Nekada sumnja može utjecati na promjenu našeg stava prema nekoj osobi, iako za to nema čvrste osnove. Na taj način nekom mogu biti uskraćena njegova zaslužena prava.

Kur'an naglašava važnost istinitog, iskrenog i direktnog govora. Ovo je mudro kada uzmemo u obzir dugoročne efekte ovakvog pristupa. Ovaj stav nije bez razloga. Islamski ideali i mišljenja su jednostavni, jasni, precizni i nedvosmisleni i traže preciznost i jednostavnost, kako u našim riječima, tako i u našim djelima.

Kaže Uzvišeni:

“O vjernici, bojte se Allaha i govorite samo istinu.”
(prevod sure El-Ahzab, 70)



Pitanja o ramazanu

1. Koji su rukovni posta?

3. Doprši hadis: "Sehurite, jer..."

2. Kada je bio propisan post?

4. Ko je dužan postiti?

5. Kada započinjemo, a kada završavamo post svakog dana?

6. Post je štit od čega?

7. Navedi čime se kvari post.

8. Koji mjesec je prije, a koji poslije Ramazana?

9. Do kad se napaštaju propušteni dani Ramazana?

10. Koja je najbolja sadaka?

Pripremila sestra Medina

Odgvori na str. 28



Allahov je Džennet uzvišeno i dragocjeno mjesto. Između njega i ljudi mnogo je zapreka i teškoća, utočišta i pribježišta, te opasnosti bez kojih ga nije moguće zaraditi. Kakve veze ovo prebivalište ima sa onim koji je tokom života slijedio svoje strasti i pohotu! Takav će biti daleko od Dženneta, na sasvim drugom mjestu, koje je za njega stvoreno i za takve kao on pripremljeno. Razmisli o tome šta se dešava s pripadnicima jedne i druge povorke, dok ih do vrata njihovih budućih vječnih prebivališta melec dovode.

Jedni se raduju susretu, šetnji sa svojom braćom, udruženi u zajednicu, radosnih lica, odlučnih srca, baš kao i na dunjaluku, kad su bili udruženi u činjenju dobra.

Drugu skupinu čine oni koji će nastaniti ono drugo, ružno prebivaliste. Oni će biti dovodeni u povorkama čiji će se pripadnici međusobno proklinjati, i jedni prema drugima će neprijatnost i nelagodu osjećati. To je jasna slika, u kojoj se slikovito vidi poniženje, sramota i jasnija je od onoga u kojoj bi bili dovodeni jedan po jedan. Dakle, nemoj zaboraviti da porazmisliš o Njegovim riječima “u povorkama.”

Čuvari Dženneta će njegovim budućim stanovnicima reći: “Mir vama!” Počet će govor selamom, koji u svom značenju podrazumijeva mir i spas od svakog zla i onog što je ružno i neugodno. Drugim riječima, bit ćete spašeni i od danas vam se nikakva neugodnost neće desiti. Zatim će im se reći: “Od grijeha ste čisti, zato uđite u njega, u njemu ćete vječno boraviti!” Drugim riječima, vas spas i ulazak u Džennet je zbog toga što ste od grijeha čisti. Allah je ovo mjesto pripremio upravo za one koji su čisti od grijeha. Tako će im izraziti dobrodošlicu, naglašavajući spasenje i sigurnost. Obradovat će ih priznanjem njihove čistote, ulaskom u Džennet i vječnim boravkom u njemu.

“Vodič ka Džennetu”, Ibn Kajjim

ليلة القدر

محمد انعامنا najodabranija noć

Rekao je Uzvišeni Allah:

“Mi smo ga objavili u noći Kadr, a šta ti znaš šta je noć Kadr? Noć Kadr je bolja od hiljadu mjeseci, meleki i Džibril, s dozvolom Gospodara svoga spuštaju se u njoj zbog odluke svake, spas je u njoj sve dok zora ne svane.”
(Prevod sure El-Kadr, 1-5)

“Mi smo ga objavili u noći Kadr,” (Ibn Kesir u svom tefsiru navodi) tj. Mi smo Kur'an objavili u blagoslovljenoj noći Kadr koja se nalazi u blagoslovljenom mjesecu ramazanu. Kur'an je odjednom iz Pomno čuvane ploče (Lehvi mahfuza) u cjelini pušten na nama najbliže nebo (Bejtul-Izzeti) a odatle po potrebi, prema događajima u toku dvadeset i tri godine objavljivan Allahovom Poslaniku, sallallahu alejhi ve sellem.

“...a šta misliš šta je noć Kadr?” Ovo je veličanje značaja ove noći u kojoj je Allah objavio Kur'an, naročito što je ona “...bolja od hiljadu mjeseci,” tj. dobro djelo učinjeno u njoj je bolje od pobožnosti u trajanju od hiljadu mjeseci u kojima ne bi bilo noći Kadr. U tom smislu Allahov Poslanik, sallallahu alejhi ve sellem, kaže: “Jedna noć borbe/držanja straže/ na Allahovom putu, bolja je od hiljadu noći provedenih na nekom drugom mjestu.” Ovaj hadis navodi Ahmed. Ebu Hurejre, radijallahu anhu, prenosi: “Kad je došao ramazan, Allahov Poslanik, sallallahu alejhi ve sellem, rekao je: ‘Došao vam je mjesec ramazan, blagoslovljeni

mjesec u kome vam je Allah propisao post. U njemu se otvaraju džennetske, a zatvaru džehennemske kapije. U njemu su okovani šejtani. U njemu je jedna noć bolja od hiljadu mjeseci. Ko bude uskraćen njenog dobra, taj je, zaista, uskraćen zato što je pobožnost provedena u njoj ravna pobožnosti u trajanju od hiljadu mjeseci.’”

Buharija u svome Sahihu i Muslim u svome Sahihu od Ebu Hurejre, radijallahu anhu, navode da je rekao: “Allahov je Poslanik, sallallahu alejhi ve sellem, rekao: ‘*Ko noć Kadr provede u ibadetu (duboko) vjerujući i nadajući se (nagradi) bit će mu oprošteni raniji grijesi.*’”

“...meleki i Džibril, s dozvolom Gospodara svoga, spuštaju se u njoj zbog odluke svake,” tj. zbog blagosovljenosti ove noći, u njoj se meleki spuštaju više nego uobičajeno. Meleki se u većem broju spuštaju kada se spušta blagoslov i milost. Tako se oni spuštaju kad se uči Kur’an i okupljaju oko ljudi koji obavljaju zikr. Oni na svojim krilima, iz poštovanja, nose onoga ko traži znanje. Pod riječi “er-Ruh” ovdje se misli na Džibrila, alejhisselam.

“...sigurnost je u njoj sve dok zora ne svane,” tj. noć Kadr je sigurna. U njoj šejtan ne može činiti zlo niti navoditi na njega. U njoj se provode odluke i određuje koliko će se živjeti i kakva će biti nafaka. U tom smislu Uzvišeni na drugom mjestu veli: **“U njoj se svaki mudri posao riješi.”** Neki kažu da se u toj noći spuštaju meleki, obilaze one koji klanjaju i blagosiljaju ih sve do zore.

U kojoj je noći Kadr?

Od Ubade ibn Samita se prenosi da je rekao: “Allahov Poslanik, sallallahu alejhi ve sellem, je rekao: ‘*Noć Kadr je u posljednjih deset dana ramazan. Ko ih provede u ibadetu moleći ih da u njima bude nagrađen, Allah će mu oprostiti i pređašnje i docnije grijehe. To je neparna noć: dvadesetdeveta, dvadesetsedma, dvadesetpeta, dvadesettreća ili dvadesetprva.*’” Muslim u svom Sahihu od Ubejj ibn Ka’ba navodi da je Allahov Poslanik, sallallahu alejhi ve sellem, rekao: “*To je dvadesetsedma noć.*” Od Muavije, Ibn Amara, Ibn Abbasa i nekih drugih se prenosi da je Allahov Poslanik, sallallahu alejhi ve sellem, rekao: “*To je dvadesetsedma noć.*” Rekao je Poslanik, sallallahu alejhi ve sellem: “*Tražite Lejletul-Kadr u neparnim noćima posljednjih deset dana ramazana.*” (Buhari, 4/225 i Muslim, 1169)

Znaci noći Kadr

Allahov Poslanik, sallallahu alejhi ve sellem, je rekao: “*Znaci noći Kadr su da je ona čista i svjetla kao da je u njoj pun mjesec. Ona je mirna i tiha. U njoj nema ni prevelike hladnoće ni vrućine. U njoj, dok ne svane, ni jednoj zvijezdi nije dozvoljeno da padne. U njene znake spada: što sunce kad ona osvane izađe zaokruženo, bez (uobičajenih) zraka, kao da je pun mjesec. Taj dan šejtanu nije dopušteno da s njime izađe.*” Sened ovog hadisa je hasen.

Poslanik, sallallahu alejhi ve sellem, je rekao: “*Ko probdije noć Kadr vjerujući i tražeći nagradu samo od Allaha, biće mu oprošteni prethodni (mali) grijesi.*” (Muttefekun alejhi)

Od Aiše, radijallahu anha, se prenosi da je rekla: “Upitala sam: ‘Allahov Poslaniče, ako pogodim noć Kadr, šta ću moliti u njoj?’ Odgovorio je: ‘Moli: *‘Allahume inneke afuvvun tuhibul -afve f’afu anni.*’ (Gospodaru moj, Ti praštaš i voliš oprost, pa mi oprosti)’” (Et-Tirmizi, 3760 i Ibn Madždže 3850 od Aiše. Njegov sened je ispravan.)

Takođe se prenosi od Aiše, radijallahu anha, da je rekla: “Poslanik, sallallahu alejhi ve sellem, se, kada bi nastupilo posljednjih deset dana ramazana, odvajao od svojih žena radi ibadeta, latio bi se i silno tražeći noć Kadr. Bdio je noću i budio svoje ukućane.” (Buhari 4/233 i Muslim, 1174)

Majka vjernika Aiša, radijallahu anha, nam takođe prenosi i sljedeći hadis: “Poslanik, sallallahu alejhi ve sellem, se mnogo trudio u deset posljednjih dana ramazana. Više nego što bi to činio van njih.” (Muslim 1174)

Enes, radijallhu anhu, prenosi: “Jednom, kada je počeo Ramazan, Allahov Poslanik, sallallahu alejhi ve sellem, je rekao: *‘Došao vam je mjesec u kojem se nalazi noć bolja od hiljadu mjeseci. Ko bude lišen njenih blagodati, lišen je sveg dobra! A njenog dobra biva lišen samo onaj ko je nesretnik!’*” (Prenosi Ibn Madže)

Enes, radijallahu anhu, prenosi da je Resulullah, sallallahu alejhi ve sellem, rekao: *“U noći Lejletul-Kadr Džibril, alejhisselam, spušta se na zemlju sa skupinom meleka, blagosiljajući svakog roba koji spominje Allaha stojeći ili sjedeći. Potom se, na dan bajrama, Allah hvali takvim robovima pred Svojim melekima: ‘O meleki Moji, šta treba da dobije uposlenik kada uradi svoj posao?’ Oni odgovaraju: ‘Gospodaru naš, on treba da dobije svoju plaću.’ Na to Allah odgovara: ‘O Moji meleki, Moji robovi, i muškarci i žene, obavili su ono što sam im Ja propisao. Zatim su skrušeno podigli svoje glasove čineći Mi dovu; tako mi Moje Moći i Veličine, i tako mi Moje Plemenitosti i Mog Uzvišenog položaja - Ja ću im se, uistinu, odazvati.’ Nakon toga Allah kaže: ‘Vratite se, Ja sam oprostio vaše grijehe i zamijenio sam vašu loša djela dobrim.’* Resulullah, sallallahu alejhi ve sellem, rekao je: *‘Oni se potom vraćaju s oproštenim grijesima.’*” (Prenosi El-Bejheki u djelu Šu'abul-iman)



Ko se s tobom bude natjecao
u tvojoj vjeri (islamu) i ti se u
tome natječi s njim, a ko se s
tobom bude natjecao u
dunjaluku, ti mu dunjaluk baci
u njegova prsa."
(Ihja 'ulumid-din, 3/207)

Kaže Hišam b. Hassan: Čuo sam
Hasana el-Basrija kako se kune
Allahom i govori:

"Niko dirhem nije uzvisio a da ga
Allah nije ponizio."
(Ez-Zehebi, Sijer e'alam en-nubela,
4/576.)

"Vjernik je na dunjaluku poput
zatočenika i on se trudi da sa sebe
skine okove. On ni od čega nije
siguran sve dok ne susretne svoga
Uzvišenog Gospodara koji kao da
mu govori: 'O sine Ademov, ti raniš
i kasniš s namjerom da stekneš što
više (imetka), a trebao bi se više
samim sobom pozabaviti jer
nikada ništa vrednije nećeš steći
od samoga sebe.'"
(Ibn Redžeb el-Hanbeli, Džami'u
'ulumi vel-hikem 1/221.)



- Hadis Zejda ibn Erkama, radijellahu anhu, da je Muavija ibn Ebi Sufjan, radijellahu anhu, bio upitan: Dali si prisustvovao za vrijeme Allahova Poslanika, sallallahu alejhi ve sellem, na dva bajrama u jednom danu? Rekao je: Da! Pa kako je postupio? Rekao je: Klanjao je bajram, zatim je dao olakšicu u džumi namazu i rekao ko hoće da klanja neka klanja. Hadis bilježe imami Ahmed, Ebu Davud, Nesai, Ibn Madže, Daremi i Hakim u Mustedreku. Ovaj hadis je ispravnog lanca prenosilaca, a imami Buharija i Muslim ga nisu izveli u svojim knjigama, uz to ima šahide ili svjedoke od hadisa na uslovima Muslima. Isto je rekao Zehebi, a Nevevi u svojoj knjizi Medžmu' je rekao: Ovaj hadis je dobrog lanca prenosilaca.

- A pomenuti šahid hadis je hadis Ebu Hurejre, radijellahu anhu, da je Allahov Poslanik, sallallahu alejhi ve sellem, rekao: *“U ovom vašem danu su se spojila dva bajrama, pa ko želi biće mu dovoljno namjesto džume, a što se nas tiče, mi ćemo klanjati džumu.”* Hadis bilježi Hakim kao što je pomenuto, i bilježi ga još Ebu Davud, Ibn Madže, Ibn Džarud, Bejehki i drugi.

- I hadis od Ibn Omera, radijellahu anhuma, da je rekao: Spojila su se dva bajrama za vrijeme Allahova Poslanika, sallallahu alejhi ve sellem, te je klanjao ljudima i rekao: *“Ko želi da dođe na džumu neka dođe, a ko želi da odsustvuje, neka odsustvuje.”* Hadis bilježe Ibn Madže, i Taberani u Velikom Mu'džemu sa riječima: Spojila su se dva bajrama za vrijeme Allahova Poslanika, sallallahu alejhi ve sellem, ramazanski bajram i džuma, pa je Allahov Poslanik, sallallahu alejhi ve sellem, klanjao bajram te se okrenuo i rekao: *“O ljudi, dobili ste hajr i nagradu, a mi ćemo klanjati džumu, pa ko želi da je klanja sa nama neka uradi, a ko želi da se vrati porodici neka se vrati.”*

- Hadis Ibn Abbasa, radijellahu anhuma, da je Allahov Poslanik, sallallahu alejhi ve sellem rekao: *“Spojila su se dva praznika u ovom vašem danu, pa ko hoće dovoljan mu je bajram, a mi ćemo, ako Allah da, klanjati džumu.”* Hadis bilježi Ibn Madže, a rekao je Busajri: Lanac prenosilaca je vjerodostojan, a ljudi u lancu su svi povjerljivi.

5. Mursel hadis od Zekvana ibn Saliha koji kaže: Spojila su se dva bajrama ili praznika za vrijeme Allahova Poslanika, sallallahu alejhi ve sellem, kurban bajram i džuma, zatim je klanjao i ustao i održao ljudima hutbu i rekao: *“Učinili ste zikr i puno hajra, a mi ćemo klanjati džumu, pa ko voli da ostane neka ostane (tj. u svojoj kući) a ko voli da klanja džumu neka klanja.”* Hadis bilježi Bejheki u Velikom Sunnenu.

6. Od Ata ibn Ebi Rebbaha, se prenosi da je rekao: Klanjao nam je Ibn Zubejr bajram namaz u danu džume na početku dana, zatim smo otišli da klanjamo džumu, a on nam nije izišao, pa smo klanjali pojedinačno, a Ibn Abbas je tada bio na Taifu, pa kada smo navratili kod njega pomenuli bi smo mu šta se desilo, a on bi rekao: Pogodio je sunnet. Predaju bilježi Ebu Davud, kao i Ibn Huzejme sa drugim riječima uz dodatak: Rekao je Ibn Zubejr: Vidio sam Omera ibn Hattaba da čini isto kada se spoje dva praznika.

7. U sahihu Buharije i Muvetta imama Malika se bilježi predaja od Ebu Ubejda Mevla Ibn Ezhera da je rekao: Prisustvovao sam za vrijeme Osmana ibn Affana dva praznika, i to za dan džume. Klanjao bi prije hutbe, zatim bi hutbu održao i rekao: *“O ljudi, u ovom danu su se sastala dva praznika, pa ko želi da sačeka džumu od onih čije kuće su daleko, neka sačeka, a ko želi da se vrati kući, ima moju dozvolu.”*

8. Od Alije ibn Ebi Taliba, radijellahu anhu, se prenosi da je rekao nakon što su se spojila dva praznika u jednom danu: *“Ko želi da klanja džumu, neka klanja, a ko želi da ostane neka ostane.”* Rekao je Sufjan: *“Da ostane, kod svoje kuće.”* Predaju bilježi Abdurrezak u Musannefu, a slična ovoj se nalazi kod Ibn Ebi Šejbe.

www.imamitewhida.com



“U mjesecu ramazanu počelo je objavljivanje Kur’ana, koji je putokaz ljudima i jasan dokaz pravog puta i razlikovanje dobra od zla. Ko od vas u tom mjesecu bude kod kuće, neka ga u postu provede, a ko se razboli ili se na putu zadesi, neka isti broj dana naposti! Allah želi da vam olakša, a ne da poteškoće imate; da određeni broj dana ispunite, i da Allaha veličate zato što vam je ukazao na pravi put, i da zahvalni budete.”

(Prevod sure El-Bekare, 185)



Hvala Allahu Koji čini da se smjenjuju godine jedna za drugom, mjesec za mjesecom, dan za danom! Allah Uzvišeni kaže: "On čini da noć i dan naizmjenice nastupaju i u tome je, doista, pouka za one koji pameti imaju." (prevod sure En-Nur, 44)

Neka je salavat i selam na onoga koji nas je usmjerio ka istini i koji donosi radosne vijesti, na njegovu porodicu i ashabe, i na sve one koji ih budu slijedili do Sudnjeg dana.

A zatim... Došao nam je veliki mjesec, čiji je početak milost, sredina oprost, a završetak spas od Vatre; mjesec Kur'ana i posta, mjesec džihada i pobjeda, mjesec u kom se umnožavaju dobra djela, mjesec pokajanja i oprosta, odabran nad ostalim

mjesecima. Pa dobro nam došao! Sestro koja postiš, u ovom pismu su savjeti tebi, za ovaj plemeniti mjesec, pa ih prihvati od one koja te voli u ime Allaha. Neka Allah primi od nas i od tebe post i namaz, On je Darežljivi i Plemeniti!

PRVO: Zahvaljuj Allahu, draga sestro, na ovoj velikoj blagodati, što ti je omogućio da dočekaš mjesec ramazan, pa požuri da se pokaješ već sada i da Allah vidi od tebe hajr, jer možda nećeš dočekati slijedeću godinu.

DRUGO: Nemoj kupovati puno hrane i pića početkom ramazana, kao što je običaj većine ljudi. Mjesec ramazan je mjesec posta, a ne mjesec jela i pića! Znaj da imaš samo dva obroka u ovom plemenitom mjesecu, sehur i iftar, kako bi bilo lakše robu da ispuni Allahova prava u ovom mjesecu, poput posta, namaza i učenja Kur'ana. Sjeti se da glad ima svoje koristi: čistoća srca i njegova mehkoća, umanjivanje prohtijeva i strasti, zdravlje organizma, spremnost za ibadet, sjećanje stanja siromaha i zahvalnost na blagodatima.

TREĆE: Čuvaj se predugog spavanja i odlaganja namaza od njegovog vremena.

ČETVRTO: Iskoristi ove dane i učini da ramazan bude svjedok koji će svjedočiti u tvoju korist kod Allaha, onoga dana kada ustanu ljudi iz kaburova i kada se razotkrije ono što prsa kriju.

PETO: Nemoj dozvoliti da tvoj dan posta bude poput dana kada nisi postač. Kada postiš neka posti tvoj sluh, vid, jezik od lažnog govora, ogovaranja i prenošenja tuđih riječi. Neka se na tebi vidi dostojanstvo i smirenost.

ŠESTO: Nemoj da tvoje ponašanje bude ružno zbog tvog posta. Neke žene se brzo ljute, pa u ljutnji kažu svašta. Možda će se neka naljutiti na djecu, pa učiti dovu protiv njih, a post je jedan od uzroka primanja dove. Budi ona koja uči dovu za njih, a ne protiv njih.

SEDMO: Navikavaj svoju djecu na post u ovom velikom mjesecu.

OSMO: Očisti svoj nijjet prilikom pripreme iftara, neka bude iskreno radi Allahovog Plemenitog Lica i nadaj se Allahovoj nagradi zbog mršenja postača.

DEVETO: Neka ti uvijek, dok si u kuhinji zauzeta pripremanjem hrane, pravi društvo neko korisno predavanje ili učenje Kur'ana ili sl., koje ćeš slušati sve dok ne završiš sa spremanjem

iftara. U ovome je velika korist i hajr.

DESETO: Propazi se, sestro, gledanja TV kanala na kojima nema hajra, i koji u ovom plemenitom mjesecu emituju razne filmove i serije, pa ti to odnosi duhovnost tvoga posta. Kaže Uzvišeni: **"Sluh, i vid, i razum, za sve to će se, zaista, odgovarati."** (prevod sure El-Isra', 36)

JEDANAESTO: Pokušaj da pripremiš iftar petnaestak minuta prije ezana, pa u tom vremenu uči Kur'an, uputi dovu, traži oprost, jer se u ovom vremenu postaču dova ne odbija. Nemoj zaboraviti svoju djecu i ukućane, i sve muslimane, u svojim dovama.

DVANAESTO: Požuri sa iftarom odmah nakon zalaska Sunca, zbog mnogih hadisa koji o tome govore.

TRINAESTO: Ne jedi puno, jer to čini tvoje tijelo teškim i poziva u lijenost u ibadetu.

ČETRNAESTO: Trudi se da u ovom mjesecu odrediš sebi sat vremena u toku noći za noćni namaz, i stajanje pred Allahom.

PETNAESTO: Dok klanjaš. Dozivaj Gospodara svih stvorenja, Stvoritelja Nebesa i Zemlje, stavi se Njemu na raspolaganje i moli Ga za oprost i čišćenje od grijeha, moli Ga da te učini nepokolebljivom na Njegovom putu, sve dok Ga ne susretneš. Možda tvoja dova naiđe na otvorena nebeska vrata, pa zaradiš sreću Dunjaluka i Ahireta!

SEDAMNAESTO: Povećaj ibadete u zadnjih deset dana ramazana, jer u jednoj od tih noći je noć vrijednija od hiljadu mjeseci; to je Lejletul-kadr. Aiša, radijallahu anha, prenosi da bi Poslanik, sallallahu alejhi ve sellem, kada bi došla zadnja trećina ramazana, smotao svoju postelju, noći bi provodio u ibadetu i budio bi svoje ukućane (Buharija i Muslim). Ko provede noć Kadra u ibadetu i namazu, vjerujući i nadajući se nagradi, biće mu oprošteni grijesi koje je počinio.

OSAMNAESTO: Čuvaj se da ne budeš poput onih žena, Allah ih uputio, koje ove dragocjene noći troše u trgovinskim centrima, kupujući bajramsku odjeću ili slatkiše, ili prave bajramska jela. Ova stvar je velika greška. Trudi se, sestro, da obaviš što možeš od bajramskih obaveza prije ramazana, a ako ne uspiješ tada, onda ne dozvoli sebi da uđeš u zadnju trećinu, a da to nisi završila, jer je zadnja trećina šansa da zaboraviš Dunjaluk i da se okreneš Allahu!

DEVETNAESTO: Nemoj se ulijeniti kada ti dođe šerijatsko opravdanje (mjesečni ciklus), pa samo ti je uskraćen namaz i post, dok su ti ostala djela, poput zikra i dove, slavljenja Allaha i istigfara, sva dozvoljena.

DVADESETO: Nemoj ni slučajno da se vratiš grijesima koje si radila prije ramazana, i nemoj biti poput one: **"...koja bi svoju pređu rasprela kad bi je već bila čvrsto oprela."** (prevod sure En-Nahl, 92) Kaže Allah, Subhanehu ve Te'ala: "A onaj ko okrene glavu od Knjige Moje, taj će teškim životom živjeti i na Sudnjem danu ćemo ga slijepim oživjeti." (prevod sure Ta-ha, 124) I znaj, sestro, da si tako pronevjerila obećanje dato Allahu, dok si se kajala i plakala ponizno pred Njim.

DVADESET PRVO: Naposti dane odmah nakon ramazana, kako bi uspjela ispostiti šest dana mjeseca ševala, zbog riječi Poslanika, sallallahu alejhi ve sellem: "Ko isposti ramazan, zatim posti šest dana ševala, kao da je postio godinu dana." (Buharija i Muslim)

Na kraju, molim Allaha Velikog, Gospodara Arša Plemenitog, da nas učini od onih kojima će Allah primiti post, namaz i ibadete, i da nas učini od onih koji će biti spašeni od Vatre i da ne učini u ovoj godini zadnji naš susret sa ramazanom, a On sve može!

Šta je LJUBAV?

Šta je ljubav ako Voljenog nemaš.
Šta je ljubav ako srce prisutno nije.
Šta je ljubav ako riječ ne očituje.
Šta je ljubav ako djelo ne potvrđuje.

Insanu mali zar da zaboraviš Onoga,
od koga sva ljubav dolazi,
a kažeš da voliti znaš ti.

Kako za prijatelja uze onoga ko te na
zlo navrati, a zaboravi Onog,
od koga sva ljubav dolazi.

Ti slijep posta jer Gospodara
Uzvišeng zapostavi a taguta i
mušrika voljenim svojim prihvati.

Teško tebi, ako tevbu ne učiniš i za
oprost Gospodara Uzvišenog,
ne zamoliš.

Sta čekaš kad u čekanju spasa nema,
šta čekaš!
Zavoli iskreno Onog čija je ljubav
jedina vrijedna ,
i život i smrt su bez Nje bez reda.



Bilježi se u dva Sahiha (Buhari, br. 4918 i Muslim, br. 2853) od Hariseta b. Vehba da je Allahov Poslanik alejhi selam rekao: “Želite li da vas obavijestim o stanovnicima Dženneta? U njega će ući svaki slabašni i nemoćni rob koji kada bi se zakleo Allahom, On bi dovoljio njegovoj molbi! A dali želite da vas obavijestim o stanovnicima Vatre? U nju će ući svaki tiranin, onaj koji se oholi, kao i onaj koji je surov.”

Prenosi Šehr b. Havšib od Abdurahmana b. Ganema da je Allahov Poslanik, alejhisselam, rekao: “‘U Džennet neće ući onaj ko je ohol, onaj koje je grub, onaj koje je surov, kao ni onaj koji se loše

ophodi prema ljudima.’ Kaže Allah, Subhanehu ve Te’ala: ‘Samo Allahovom milošću ti si blag prema njima; a da si osoran i grub, razbjegli bi se iz tvoje blizine.’” (prevod sure Alu 'Imran, 159) Hadis bilježi imam Ahmed.

Što se tiče oholnika to je onaj koji zlostavlja ljude i koji se nad njima uzdiže. Kaže Uzvišeni Allah:

“Na Sudnjem danu vidjećeš pocrnjela lica onih koji su o Allahu laži govorili.
A zar u Džehennemu neće biti boravište oholih?”
(prevod sure Ez-Zumer, 60)

Bilježi imam Ahmed od Ehu Hurejre, radijallahu anhu, da je Allahov Poslanik, alejhisselam, rekao: “‘Hoćete li da vas obavijestim o stanovnicima Dženneta?’ Ashabi odgovoriše: ‘Da Allahov Poslaniče.’ ‘To su slabi i nemoćni, oni koje ljudi ugnjetavaju, a da li želite da vas obavijestim o stanovnicima Vatre?’ Ashabi odgovoriše: ‘Da Allahov poslaniče.’ ‘To su oni koji se ohole i koji nisu osjetili bol ugnjetavanja.’”

On također bilježi od Surake b. Malika b. Džašuma da mu je Allahov Poslanik, alejhisselam, rekao: “‘O Suraka, da li želiš da te obavijestim o stanovnicima Dženneta i Vatre?’ Rekao sam: ‘Da Allahov Poslaniče!’ Poslanik reče: ‘Što se tiče stanovnika Vatre, to će većinom biti silnici i oholnici, dok će u Džennetu biti većinom oni slabi i ugnjetavani.’” Hadis bilježi Imam Ahmed i Et-Taberani u El-Kebiru i El-Evsatu sa dobrim lancem prenosilaca.

Prenosi Amr b. Šua'jb da je Allahov Poslanik, alejhisselam, rekao: “Na Sudnjem danu će oholnici biti proživljeni mali kao mravi u obliku ljudi, i ništa od njih neće biti manje, sve dok ne budu uvedeni u džehennemske tamnice, zvane Bulus, biće prekriveni najžešćom vatrom, pojiće se zgrušanim gnojem koji će isticati iz stanivnika Džehennema.” Hadis bilježe imam Ahmed, Tirmizi i En-Nesai. Kaže imam Tirmizi: Hadis je dobar.

Et-Tahvifu Mine-n-Nar, Ibn Redžeb El-Hanbeli

Odgovori na pitanja

2. Kada je bio propisan post?

Post je bio propisan druge godine po Hidžri. Rekao je Uzvišeni: "O vjernici, propisuje vam se post, kao što je bio propisan onima prije vas, da biste bili bogobožni." (prevod sure El-Bekare: 183)

Nevevi je rekao: "Allahov Poslanik, sallallahu alejhi ve sellem, postio je devet ramazana, jer je on naređen u ša'banu druge godine po Hidžri, dok je Allahov Poslanik, sallallahu alejhi ve sellem, preselio u mjesecu rebiul-evvelu jedanaeste godine po Hidžri." (El-Medžmu' /20)

Slično navodi i hafiz Ibn Hadžer el-Aškalan u svom djelu Fethul-Bari, 1/50.

Makrizi je rekao: "U mjesecu ša'banu (druge godine po Hidžri) propisan je post." (Imtaus-Sema, 1/79)

Isto ovo navodi i imam Ševkani: "Propisivanje posta mjeseca ramazana dogodilo se druge godine po Hidžri." (Nejlul-evtar, 4/258)

5. Kada započinjemo, a kada završavamo post svakog dana?

Post započinjemo sa nastupanjem zore, a završavamo kad nastupi akšam. Uzvišeni Allah dopustio je konzumiranje hrane i pića sve do nastupanja zore: "Jedite i pijte sve dok ne budete mogli razlikovati bijelu nit od crne niti zore, te od tada upotpunite post do noći." (prevod sure El-Bekare, 18) Bijela i crna nit u ovom ajetu znače svjetlo dana i tamu noći." (Buharija, 4510, Muslim, 1091.)

7. Navedi čime se kvari post.

Islamskih učenjaci najčešće navode sledeće razloge:

1. Jelo i piće.
2. Polni odnos.
3. Izlazak krvi hajza i nifasa.
4. Riddet (Odmetništvo od islama), jer Uzvišeni kaže: "A tebi, i onima prije tebe objavljeno je: Ako učiniš širk, tvoja djela će sigurno propasti, a ti ćeš izgubljen biti." (prevod sure Ez-Zumer, 65)
5. Ako se namjerava prekinuti post. Isto se odnosi ako je neodlučan u odluci.
6. Post se prekida namjernim povraćanjem prema hadisu: „Ko se bude tjerao na povraćanje neka naposti a ko nenamjerno povrati ne treba napaštati." (Prenose peterica)
7. Post kvari izlazak sperme, a ako izađe sama onda neće biti pokvaren. Post je prekinut i ejakulacijom u svim situacijama, osim ejakulacijom u snu, jer ona nije namjerna.
8. Post se prekida upotrebom onoga što ulazi u unutrašnjost tijela. U El-Mugniju stoji: „Postać prekida post sa svim što namjerno unese u svoje tijelo ili unutrašnjost tijela kao npr. glavu ili grlo.

1. Koji su rukovni posta?

Post se sastoji iz dva rukna;

1. Uzdržavanje (imsak) od onog što kvari post od pojave zore pa do zalaska sunca. Dokaz za to su riječi Uzvišenog: "I jedite i pijte dok ne budete razlikovali nit bijelu od niti crne (dok zora ne zabijeli), zatim upotpunite post do noći." (El-Bekara, 187.)

2. Nijjet (odluka)

Potvrda za to jeste hadis koji prenosi Ibn-Umer od Hafse da je Muhammed, sallallahu alejhi ve sellem, rekao: "Ko ne zaniijeti ovaj post prije sabaha, nema posta." (En-Nesai, Et-Tirmizi, Ibn-Madže, Ahmed, Ibn-Huzejme, Ibn-Hibban i Ed-Darekutni)

3. Doprvi hadis: "Sehurite, jer..."

"Sehurite, jer u sehuru je bereket!" (Buharija, 4/120 i Muslim, br. 1095)

4. Ko je dužan postiti?

Islamski učenjaci složili su se da obaveza posta pada na pametnog i punoljetnog, spolno zrelog i zdravog muslimana, koji se nalazi kod kuće. A za žene je uvjet da su čiste od hajda i nifasa. Prema tome, obaveza posta ne odnosi se na nevjernika, luđaka, dijete, bolesnika, putnika.

6. Post je štit od čega?

Rekao je Allahov Poslanik, sallallahu alejhi ve sellem: "Post je štit od Allahove kazne." (Bejheki, Ahmed, Nesai, Ibn Madže) U drugom rivajetu stoji: "Post je štit kojim se rob štiti od vatre."

8. Koji mjesec je prije, a koji poslije Ramazana?

Mjesec prije Ramazana zove se Š'aban, a mjesec poslije je Ševval.

9. Do kad trebamo napostiti propustene dana Ramazana?

Propuštene dane trebamo napostiti do početka sljedećeg Ramazana. Bilježi Muslim u svom Sahihu od Aiše, radijallahu anha, da je ona napaštala propuštene dane Ramazana u mjesecu Š'abanu.

10. Koja je najbolja sadaka?

Prenosi se od Enesa ibn Malika, radijAllahu anhu, da je Poslanik, sallallahu alejhi ve sellem rekao: "Najbolja sadaka je u ramazanu." (Tirmizi).



MILOST

OPROST

SPAS od **Vatre**